



Chor claustral.



Parada.



El pastor de Ursera, Sr. el avat Vigeli Monn e pader decan Bruno Rieder.



Il mistral d'Ursera Beat Schmid cun la saltera Barbara Simmen.

Sogn Placi – resta solemns ed attractivs

Bia glied e cletgun cun l'aura

DA GIUSEP CAPAUL / ANR

■ Per la secunda e davosa gada ei la fiasta da s. Placi vegnida celebrada uonn aschidadir «extra muros» dalla claustra, numnadamein ella baselgia parochiala da S. Gions a Mustér. Da s. Martin vegn la baselgia claustrala restaurada puspei aviarta. La parochiala da Mustér era occupada sil davos plaz ditg avon ch'il survetsch divin pontifical entscheivi. Suerter igl ingress solemn dil celebrant e convent salida avat *Vigeli Monn* scolaras e scolaras, veneratur dils sogns patrums-fundatur s. Placi e Sigisbert, delegaziuns d'Ursera e dil Blegn ed

era representants d'autoritads federalas, cantunalas e regiunalas. In special bein-vegni fa el ad avat *Urban Federer*, da Nosadunnaun, ch'ei vegnius per l'emprema ga sco celebrant principal e predicatur. Per avat Urban stat – sco per avat *Vigeli* – la cardientscha el center dalla festività hodierna.

Il survetsch divin solemn vegn salvas tradiziunalmeins en romontsch, latin e tudestg. Embellius vegn el dil chor dalla claustra – sut direcziun da *Peter Werlen* – e sustenius digl orchester, organist e solistas e solists – cun la «Nikolaimesse» da Joseph Haydn cun vitier aunc dentercants e produczziuns musicalas. Igl ei stau

elevont. Avat Urban ha centrau siu priedi sin la cardientscha, vegnida e sederasada tier nus tras collaboraziun denter igl indigen s. Placi e s. Sigisbert, il monast ambulont, arrivau da lunsch neutier. La finamira da quella ei Dieus. La cardientscha dat speronza che Diu vegli bein cun nus. El ei misericordeivels, ha dau tut quei che nus duvrein per esser ventireivels. Mo che nus stuein star persuerter «online» cun el tras viver quella cardientscha e dar ella vinavon.

La processiun da gronda varietad semova suenter messa – cun la societad da musica e la parada ordavon – tras il vitg si viers la claustra, durant ch'ins cantava

la canzun da s. Placi u recitava il rusari. Arrivau avon porta claustrala ha avat Urban dau la benedicziun.

Buca muncar – sco finiziun – astgan las salvias dalla Societad da musica da Mustér e dallas uniuns da giuventetgna. L'emprema ei stada pils dus avats Urban Federer e *Vigeli Monn*, suandada da quella pil mistral d'Ursera, *Beat Schmid*, cun la saltera *Barbara Simmen*. La tiarza ei stada dedicada als parlamentariss federalis: cuss. naz. *Magdalena Martullo* e cuss. naz. *Martin Candinas*. Era ils dus cussegliers guvernativs *Marcus Caduff* e *Christian Rathgeb* (che veva giu il di avon nozzas en claustra) ed a zacons deputai

dalla Cadi ei vegniu rendiu quella honur sco era a presidents communalis dalla Cadi ed al representant dil municipio da Blegn. La Societad da musica ed ils Tamburs da Mustér – cun las uniuns da giuventetgna – han dau bialas produczziuns e la parada las salvias.

Ins era aunc buca diltut a fin ch'ei ha entschiet a plover – sco ei veva fatg gia cuort avon messa. Denteren ha l'aura lubiu da far ton fiasta sco processiun senza disturbi, mo cun favur da sura. Aschia ei l'entira festività sesplegada – sco da pi tschentaners – en biala fuorma e successiun cun siu reh cuntegn e sco clar confess.

